



Na osnovu člana 22 Statuta Brčko distrikta BiH – prečišćeni tekst (Službeni glasnik Brčko distrikta BiH, broj 2/10), člana 64 Poslovnika o radu Skupštine Brčko distrikta BiH (Službeni glasnik Brčko distrikta BiH, brojevi 17/08, 20/10, 4/13 i 31/13), i Prijedloga odluke Vlade Brčko distrikta BiH broj predmeta: 02-000246/14, broj akta: 01.11-1031DS-20/14 od 12. 12. 2014. godine, Skupština Brčko distrikta BiH, na 46. redovnoj sjednici održanoj 23. decembra 2014. godine, donosi

ODLUKU

O USLOVIMA I POSTUPKU PRIJAVE NA OBAVEZNO ZDRAVSTVENO OSIGURANJE LICA STARIJIH OD 65 GODINA

Član 1

Ovom odlukom utvrđuju se uslovi i postupak prijave na obavezno zdravstveno osiguranje lica starijih od 65 godina života s prebivalištem u Brčko distriktu Bosne i Hercegovine.

Član 2

U okviru mjera socijalne politike, licima starijim od 65 godina života utvrđuje se pravo prijave na obavezno zdravstveno osiguranje i status osiguranog lica u skladu sa Zakonom o zdravstvenom osiguranju Brčko distrikta Bosne i Hercegovine (u daljnjem tekstu: Zakon o zdravstvenom osiguranju), ako su kumulativno ispunili sljedeće uslove:

- a) ukoliko je podnesena prijava za utvrđivanje prava iz obaveznog zdravstvenog osiguranja;
- b) ako su u vrijeme podnošenja prijave iz tačke a) ovog člana navršili 65 godina života,
- c) ako imaju prebivalište u Brčko distriktu Bosne i Hercegovine najmanje pet godina neprekidno u momentu podnošenja prijave iz tačke a) ovog člana,
- d) ako ne ostvaruju prihode u Brčko distriktu Bosne i Hercegovine,
- e) ako nisu ostvarili podsticaj za poljoprivredu u iznosu od 5.000,00 KM i više,
- f) ako nemaju u vlasništvu nekretnine čija vrijednost poreza na godišnjem nivou prelazi iznos od 150,00 KM,
- g) ako nisu zdravstveno osigurani po drugom osnovu u Bosni i Hercegovini ili u inostranstvu.

Član 3

U smislu člana 2 tačke d) ove odluke, u prihode se ne uračunavaju sredstva ostvarena po osnovu pomoći za izdržavanje, pomoći za podmirenje troškova stanovanja, novčane naknade za tjelesno oštećenje, doplatka za pomoć i njegu, ortopedskog dodatka, lične invalidnine, doplatka za djecu, a iznos prihoda umanjuje se za iznos koji na osnovu propisa o porodičnim odnosima član porodice plaća za izdržavanje osobe koja nije član te porodice.

Član 4

(1) Postupak prijave na obavezno zdravstveno osiguranje lica iz člana 2 ove odluke pokreće se od strane lica starijeg od 65 godina ili njegovog skrbnika (za lice lišeno poslovne sposobnosti), njegovog bračnog druga, punoljetnog djeteta, odnosno drugog srodnika s kojim živi u porodici.

(2) Prijava iz stava 1 ovog člana podnosi se Fondu zdravstvenog osiguranja Brčko distrikta Bosne i Hercegovine (u daljnjem tekstu: Fond).

Član 5

(1) O priznavanju prava po osnovu obaveznog zdravstvenog osiguranja lica iz člana 2 ove odluke, na osnovu dokumentacije kojom dokazuju ispunjenost uslova iz člana 2 ove odluke, odlučuje Fond koji odnosnim licima priznaje status osiguranika Fonda izdavanjem zdravstvene legitimacije.

(2) Radi zaštite prava propisanog ovom odlukom, podnosiocu prijave kojem se ne utvrdi pravo iz obaveznog zdravstvenog osiguranja, omogućava se dvostepeno rješavanje u postupku u skladu s odredbama Zakona o zdravstvenom osiguranju.

Član 6

(1) Obveznik uplate doprinosa za obavezno zdravstveno osiguranje za lica iz člana 2 ove odluke, kojima je priznat status osiguranog lica je Odjeljenje za zdravstvo i ostale usluge Vlade Brčko distrikta Bosne i Hercegovine (u daljnjem tekstu: nadležno odjeljenje).

(2) Sredstva za finansiranje prava iz obaveznog zdravstvenog osiguranja za ovu namjenu Odjeljenje osigurava iz sredstava budžeta Odjeljenja za tekuću godinu.

Član 7

Lice kojem je u skladu s ovom odlukom utvrđen status osiguranog lica dužno je u zakonom propisanom roku obavijestiti Fond o promjeni činjenica i okolnosti iz člana 2 ove odluke.

Član 8

(1) Lice koje je oslobođeno od plaćanja doprinosa za obavezno zdravstveno osiguranje u skladu s ovom odlukom dužno je nadoknaditi nastalu štetu ako je oslobođeno od plaćanja doprinosa za obavezno zdravstveno osiguranje na osnovu neistinitih ili netačnih podataka za koje je znao ili morao znati da su neistiniti ili netačni, te ako nije postupio u skladu s odredbom člana 7 ove odluke.

(2) U postupku naknade štete prouzrokovane od strane lica iz stava 1 ovog člana primjenjivat će se odredbe Zakona o zdravstvenom osiguranju.

Član 9

(Početak ostvarivanja prava)

Prava iz obaveznog zdravstvenog osiguranja, ispunjenjem uslova utvrđenih od strane Fonda, počinju se ostvarivati od dana izdavanja zdravstvene legitimacije.

Član 10

(Prestanak prava)

Prava utvrđena u skladu s ovom odlukom prestaju: a) smrću korisnika prava, danom smrti; b) ostvarivanjem istog prava po nekom drugom osnovu, danom ostvarivanja prava ili danom saznanja za ostvareno pravo; c) prestankom ispunjenosti uslova na osnovu kojih je utvrđeno pravo, danom nastanka okolnosti koje utiču na ostvarivanje prava.

Član 11

U postupku ostvarivanja prava iz obaveznog zdravstvenog osiguranja lica starijih od 65 godina primjenjivat će se odredbe Zakona o zdravstvenom osiguranju, ukoliko nije propisano ovom odlukom.

Član 12

Ova odluka stupa na snagu osmog dana od dana objave u Službenom glasniku Brčko distrikta Bosne i Hercegovine.

Broj: 01-02- 391/14
Brčko, 23. 12. 2014. godine

**PREDSJEDNIK
SKUPŠTINE BRČKO DISTRIKTA BIH**

Đorđa Kojić

Dostavljeno:

- 1) Predsjedniku
- 2) Dopredsjedniku
- 3) Gradonačelniku
- 4) Odjeljenju za zdravstvo i ostale usluge
- 5) Fondu zdravstvenog osiguranja
- 6) Direkciji za finansije
- 7) Sektoru za koordinaciju politika i opće poslove
 - Odsjeku za opće poslove
- 8) Arhivi